

Inatsisartut suleriaasianni § 37, imm. 1 naapertorlugu Naalakkersuisunut apeqquq matumuuna saqqummiuppara:

**Naalakkersuisunut apeqqutit:**

- 1. Naalakkersuisut ilumuunnginnerarsinnaavaat, Danmarkip Kalaallit Nunaannut upalungaarsimanissamik pilersaarutaasa ilagigaat, akornusersuiniarnermut atatillugu (nægtelsesoperation) Kalaallit Nunaanni inuinnarnut atortulersuutit unitsinnissaat, aserornissaat imaluunniit piuneerunnissaat?**
- 2. Naalakkersuisut paasissutissiissutigisinnaavaat, Naalakkersuisut ilisimaneeraat pilersaarutit taamaattut taamaallaat Nuup Kangerlussuullu mittarfiinut tunnganersut, imaluunniit mittarfiit allat, umiarsualiviit, nukissiorfiit, imeqarnermut, kiassarnermut, ikummatissaqarnermullu pilersuinerit, immap naqqatigut kabelit, paasissutissanik attaveqaatit imaluunniit inuiaqatigiinni atortulersuutit pingaarutillit allat aamma pineqarnermut?**
- 3. Naalakkersuisut paasissutissiissutigisinnaavaat, pilersaarutit illoqarfinnut ataasiakkaanut atortulersuutinulluunniit tunngatinneqarsimanersut, imaluunniit pilersaarutit Kalaallit Nunaanni inuiaqatigiinni atortulersuutit pingaarutillit allattorsimaffiannik annertunerusumik imaqarsimanersut?**
- 4. Naalakkersuisut ilumuunnginnerarsinnaavaat, Utoqqarmiut Kangerluarsunnguut, Nukissiorfiit nukissiorfiisa allat, upalungaarsimanermit innaallagissiorfiit imaluunniit Nuummur innaallagissamik pilersuineq sakkutuut akornusersuinissamik, unitsitsinissamik imaluunniit aserorterinissamik pilersaarutaannut ilaatinneqarsimanersut?**
- 5. Naalakkersuisut paasissutissiissutigisinnaavaat, illersornissaqarfiup Utoqqarmiut Kangerluarsunnguanni suliasai taamaallaat paarsinermit illersuinerimullu tunngasimanersut, imaluunniit Naalakkersuisut aamma atortulersuutit atorsinnaajunnaarsinneqarsinnaaneranut tunngasunik ilisimatinneqarsimanersut?**
- 6. Naalakkersuisut ilumuunnginnerarsinnaavaat, umiarsualivinni atortulersuutit, ikummatissaqarnermut pilersuineq, immap naqqatigut kabeli, paasissutissanik attaveqaatit imaluunniit nerisassanik, nakorsaatissanik ikiuigasuarnernullu atortussanik pilersuinermit aqqutit taamaattunut sakkutuut upalungaarsimanissamik pilersaarutaannut ilaatinneqarsimanersut?**

7. Naalakkersuisut paasissutissiissutigisinnaavaat, Danmarkip Naalakkersuisut ilisimatissimaneraat mittarfinnik, umiarsualivinnik, nukissiorfinnik, imeqarnermut, kiassarnermut, attaveqaatinut pilersuinernullu atortulersuutit Kalaallit Nunaanni aserorterinerup imaluunniit unitsitsinerup inuinnarnut kingunerisinnaasai pillugit, pingaartumik ukiuunerata nalaani?
8. Naalakkersuisut nalilersorsimanerlugu nunatta ilaata avammut attaveqarnerminut avissaartinneqarsimasinnaanera qanoq sivilisutigisinnaanersoq ukunani; mittarfiit, umiarsualiviit, sarfamik pilersorneqarneq, kiassarnermik pilersorneqarneq, imermik pilersorneqarneq qarasaasiatigullu attaveqaqatigiinneq atorunnaarsinneqaraluarpata?
9. Naalakkersuisut napparsimasunut, utoqqarnut, meeqqanut, nunaqarfinnut, isorliunerusunut inunnullu nakorsaatisanik pisariaqartitsisunut kingunerisinnaasai nalilersorsimavaat, timmisartukkut angallassineq, inunnik qimagussuineq, pilersuineq ikiugasuarnerrillu sivilisuumik unitsinneqassagaluarpata?
10. Naalakkersuisut ilisimatitsissutigisinnaassanerpaat innuttaasut ulluni tallimani imminnut pilersorsinnaanerannut innersuussinernut tunngatillugu, aamma peratarsinnaasunut assigiinngitsunut tunngatillugu, tassani atortulersuutit inuiaqatigiit pinngitsoorsinnaanngisaat qallunaat sakkutuuniit piaaraluni atorsinnaajunnaarsinneqassagaluarpata?
11. Naalakkersuisut politikikkut akuersissuteqarsimappat, akuersisimappata imaluunniit akerlilinngitsoorsimappata, qallunaat imaluunniit iligiit sakkutuuisa Kalaallit Nunaanni inuiaqatigiinni atortulersuutit unitsissinnaagaat, innarlarsinnaagaat imaluunniit asersinnaagaat, avataaniit nunat pissaanilissuarniit atorneqannginnissaat anguniarlugu?
12. Naalakkersuisut taamaattumik akuersissuteqarsimanngippata, Kalaallit Nunaanni inuiaqatigiinni atortulersuutit pinngitsoorneqarsinnaanngitsut aserorterneqannginnissaat, atorunnaarsinneqannginnissaat imaluunniit atorsinnaajunnaarsinneqannginnissaat pillugu, kalaallit politikikkut siumoortumik akuersitinnagit, Naalakkersuisut Danmarkip naalakkersuisuinut allakkatigut qularnaveeqummik piumasaqaateqassappat?
13. Kalaallit innuttaannut sullissisut suut upalungaarsimanissamik pilersaarusiornernut ilaatinneqarsimappat, tamatumunnga ilanngullugit Nukissiorfiit, Tusass,

**Mittarfeqarfiit, Air Greenland, Royal Arctic Line, kommunit aamma upalungaarsimanermut oqartussat?**

**14. Naalakkersuisut isumaat malillugu, kina aningaasatigut akisussaassuseqassanersoq nutaamik sananermut, taarsiissutinut, avatangiisinik saliinermut kiisalu ingerlatsinermi annaasanut, qallunaat sakkutuuisa pilersaarutaat pissutaallutik Kalaallit Nunaanni inuiaqatigiinni atortulersuutit innarlernneqassagaluarpata?**

**15. Naalakkersuisut isumaqarpat, Danmarkip inuiaqatigiinni atortulersuutit pinngitsoorneqarsinnaanngitsut unitsinneqarnissaannik aserorterneqarnissaannilluunniit illuinnaasiortumik pilersaarusiorsinnaanera, Namminersorlutik Oqartussat pillugit inatsisip naliigiinnermut, ataqpeqatigiinnermut aamma kalaallit inuisa nammineq aalajangiisinnaatitaanermut tunngavigisaanut naapertuuttusoq?**

**16. Naalakkersuisut inuiaqatigiinnut ammasumik nassuiaammik kiisalu Inatsisartuni ataatsimiititaliamut attuumassuteqartumut isertuussamik nassuiaammik saqqummiussiniarpat, Kalaallit Nunaanni atortulersuutit suut qallunaat iligiilluunniit sakkutuunit illersorneqarnissaannik, unitsinneqarnissaannik aserorterneqarnissaannilluunniit pilersaarutigineqarsimanersut pillugit?**

**17. Naalakkersuisut nassuiaasinnaappat, Naalakkersuisut akuersaarinnissimanerlutik Danmarkip nunarput illersorsinnaagaa aatsaat nunarput kalaallinut najugarineqarsinnaajunnaarteqqaarlugu?**

(Inatsisartunut ilaasortaq Pele Broberg, Naleraq)

**Tunngavilersuut:**

Naalakkersuisut januar 2026-mi innuttaasunut paasissutissamik saqqummiippat "Ajornartorsiornissamut sillimaneq – ullut unnuallu tallimat", tassani inoqutigiit ulluni unnuanilu tallimani ajornartorsiortoqalissagaluarpat imminut pilersorsinnaanerinit innersuussutit saqqummiunneqarlutik. Namminersorlutik Oqartussanik suliffeqarfiit pigineqartut aamma Issittumi Sakkutooqarfik, Kalaallit Nunaanni Politiit, kommunillu ilaatigut suleqatigalugit suliaq ingerlanneqarsimasoq, innersuussutigineqarlutik imeq najoqqagassaq, nerisassat, nakorsaait kiassarneq attaveqatigiinnerlu Naalakkersuisut ilisimatitsissutigaat.

Ilutigalugu Illersornissaqarfiup annertusisamik nunatsinniinnerat aamma Arctic Endurance-mi sungiusarnerinut atatillugu Utoqqarmiut Kangerluarsunnguannik qallunaat sakkutuuisa sungiusarnerminni paarsinerat tamanut Illersornissaqarfimmit nalunaarutigineqarpoq. Pissaanillinnillu takornartanit Nuup Kangerlussuullu mittarfisa atorineqannginnissaat

anguniarlugu aserornissaannut piareersimasimasut qallunaat sakkutuui iligisallu sakkutuui januarimi 2026 ajornartorsiornermut atatillugu paasissutissanik tamanut aamma paasissutissiisoqarsimavoq.

Kalaallit Nunaanni mittarfiit, umiarsualiviit, innaallagissiorfiit, imermik pilersuineq, kiassarnermik pilersuineq, qarasaasiakkut attaveqaqatigiinneq, ikummatissanik pilersuineq aamma allatigut pilersuinerit aqqutaat teknikikkut atortulersuutitut nalginnartut isigineqarsinnaanngillat. Inuiaqatigiinnut tamakku inuunermut atatitsisuupput. Atortulersuutit tamakku atorunnaarsinneqaraluarpata pingaartumik aamma ukiuunerani tamanna isumaqassaaq avammut attaveqarnerit aamma nakorsartinnerit, napparsimasunik angallasserit, imeq, kiassarneq, nakorsaatit nerisassallu innuttaasunit pineqarsinnaajunnaarnerinik.

Naalagaaffiit innuttanut pisussaaffiisa tunngaviumik periuseq malillugu taava innuttaasut sakkutuujunngitsut annannissaannut periarfissat ingerlanneqarlutik sakkutuulersuunermut pilersaaruteqarnermut pingaanninnerusumik inissinneqassanngillat. Kalaallit Nunaanni mittarfiit, umiarsualiviit, innaallagiaq, kiassarneq, imeq, attaveqaqatigiinnikkut oqaloqateqarnerit aamma pilersuinerit attaveqaatit inuiaqatigiinnit atortulersuutini pinngitsoorneqarsinnaanngitsuni nalginnaasuunngillat. Pingaartumik ukiuunerani inuiaqatigiit annassutigisassaattut atornerqarput. Aaqqiagiinnginnermi sakkulersuuffiusumi nunat tamalaat akornanni ikiuiniarnermut pisinnaatitaaffiup ilaatigut makku illersugassarai sakkutuujunngitsut atortui aamma saassussinissamut inerteqqutit, aserorterineq, atortunik piianeq atorsinnaajunnaartitsinerluunniit, tamakkumi innuttaasut sakkutuujunngitsut aniguiarneranni pinngitsoorneqarsinnaanngillat.

Kalaallit Nunaata Qallunaat Nunaatalu akornanni ataqqeqatigiinneq, nalginneq namminerlu Naalagaaffiit innuttaannut pisussaaffiitut tunngatillugu aalajangersinnaassuseq kalaallit innuttaasa inuiattut akuerineqarnerannut Namminersornermut Inatsimmi ilutigalugu sananeqarsimavoq. Taamaattumik pingaaruteqarluinnarpoq paaseqqissaallugu ilumut Naalakkersuisut kisimik inuiaqatigiinni atortulersuutit pinngitsoorneqarsinnaanngitsut pillugit illersuinissaminut ilisimatinneqarsimanersut, imaluunniit Naalakkersuisut ilisimasimaneeraat aamma akueralugulu imaluunniit pilersaarutinut itigartitsinissamut, atorunnaarsitsinissamut aseruissamulluunniit kalaallit sakkutuujunngitsut inuiaqatigiinni atortulersuutaat pinngitsoorneqarsinnaanngitsut pillugit akerliusimanginnerisut.

Naalakkersuisut taamaattumik nassuiartariaqarpaat Naalakkersuisut akuersaarsimanersut Qallunaat Nunaata ajornartoormik pisoqartillugu Kalaallit Nunaannik illersuisinnaanersut Kalaallit Nunaat kalaallinut aatsaat nunagineqarsinnaajunaaqqaarlugu.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavineqassaaq.